



Broj/ Број : 02/2-50-1-23-23/09

Sarajevo/ Сарајево: 25.2.2009. godine

ZAPISNIK

23. sjednice Komisije za vanjsku i trgovinsku politiku, carine, saobraćaj i komunikacije

Doma naroda

Parlamentarne skupštine Bosne i Hercegovine, održane 18.2.2009. godine

Sjednicu Komisije za vanjsku i trgovinsku politiku, carine, saobraćaj i komunikacije Doma naroda Parlamentarne skupštine BiH (u daljnjem tekstu: Komisija) sazvala je predsjedavajuća Komisije Alma Čolo.

Sjednici Komisije, u svojstvu članova, prisustvovali su: Alma Čolo, Dušanka Majkić, Adem Ibrahimpašić, Rudo Vidović i Slobodan Šaraba, te Nenad Pandurević, sekretar i Dobrinka Savić stručni saradnik u Komisiji. Opravdano je odsustvovao Branko Zrno.

Sjednici su, u svojstvu predlagača i izvjestilaca, prisustvovali: Biljana Čamur, pomoćnica ministra, i Adnan Husić, stručni saradnik za evropske integracije u Ministarstvu civilnih poslova BiH, Miroljub Krnić, pomoćnik ministra finansija i trezora BiH, Sabrija Šerifović, pomoćnik ministra, i Šefika Tutundžić, šef Odsjeka za carinsku tarifu u Ministarstvu vanjske trgovine i ekonomskih odnosa BiH, Zahida Hurtić-Strika, šef Odsjeka za normativnu djelatnost u Ministarstvu prometa i komunikacija BiH, Miloš Prica, ambasador, i Goran Behmen, prvi sekretar u Ministarstvu vanjskih poslova BiH, i Ljubomir Kuravica, šef odsjeka u Ministarstvu sigurnosti BiH, i Zoran Brkić, viši stručni saradnik u Sektoru za odnose s javnošću PSBiH.

Sjednica Komisije počela je u 12 sati.

Nakon što je konstatirala da postoji kvorum, predsjedavajuća Komisije Alma Čolo otvorila je raspravu o predloženom dnevnom redu i s tim u vezi predložila da tačka 1. Usvajanje Zapisnika 22. sjednice Komisije, koja je bila predložena u dnevnom redu, dostavljenom uz poziv za sjednicu, ne bude danas razmatrana iz jednostavnog razloga što zapisnik prethodne sjednice još uvijek nije lektoriran na tri jezika te nije dostavljen članovima Komisije. Predložila je da se Zapisnik 22. sjednice razmatra na sljedećoj sjednici Komisije. Prijedlog je jednoglasno prihvaćen nakon čega je predsjedavajuća Komisije za sjednicu predložila sljedeći

DNEVNI RED

1. Razmatranje Prijedloga zakona o dopuni Zakona o Javnom RTV sistemu BiH (druga komisijska faza), predlagač: Vijeće ministara BiH;
2. Razmatranje Prijedloga zakona o dopuni Zakona o carinskoj tarifi BiH (prva komisijska faza), predlagač: Vijeće ministara BiH;

3. Davanje saglasnosti za ratifikaciju Sporazuma između Bosne i Hercegovine i Švicarske o olakšicama prilikom izdavanja viza;
4. Davanje saglasnosti za ratifikaciju Sporazuma između Bosne i Hercegovine i Švicarske o readmisiji lica koja borave bez dozvole;
5. Davanje saglasnosti za ratifikaciju Sporazuma o zaštiti tajnih podataka između Vlade Slovačke Republike i Vijeća ministara BiH;
6. Davanje saglasnosti za ratifikaciju Sporazuma između Vijeća ministara BiH i Vlade Republike Crne Gore o vraćanju i prihvatanju lica čiji je ulazak ili boravak nezakonit i Protokola između Ministarstva sigurnosti BiH i Ministarstva unutrašnjih poslova i Javne uprave Republike Crne Gore o provođenju Sporazuma između Vijeća ministara BiH i Vlade Republike Crne Gore o vraćanju i prihvaćanju lica čiji je ulazak ili boravak nezakonit;
7. Davanje saglasnosti za ratifikaciju Okvirne konvencije Svjetske zdravstvene organizacije o kontroli duhana;
8. Davanje saglasnosti za ratifikaciju Memoranduma o razumijevanju između Bosne i Hercegovine i Evropske zajednice o pridruživanju Bosne i Hercegovine Sedmom okvirnom programu Evropske zajednice za istraživanje, tehnološki razvoj i ogledne aktivnosti;
9. Davanje saglasnosti za ratifikaciju Sporazuma između Vijeća ministara BiH i Vlade Republike Crne Gore o saradnji u oblasti kulture;
10. Davanje saglasnosti za ratifikaciju Sporazuma o zajmu između Bosne i Hercegovine i Evropske banke za obnovu i razvoj – Projekat Koridor Vc;
11. Davanje saglasnosti za ratifikaciju Izmjene sporazuma između Vijeća ministara BiH, koje predstavlja Ministarstvo finansija i trezora BiH, i Vlade Republike Austrije, koju predstavlja savezni ministar finansija o finansijskoj saradnji;
12. Razmatranje Izvještaja Ministarstva vanjske trgovine i ekonomskih odnosa BiH o realizaciji Akcionog plana za provođenje programa mjera u okviru CEFTA sporazuma s Analizom vanjskotrgovinske razmjene BiH za 2008.;
13. Razmatranje izvještaja i informacija Ministarstva vanjskih poslova BiH:
 - Rezolucija o Srebrenici, sjednica Evropskog parlamenta, Strazbur, 14. i 15. januar 2009. godine,
 - Izvještaj o 11. interparlamentarnom sastanku delegacije Parlamentarne skupštine BiH i Evropskog parlamenta, Brisel, 21. i 22. 1. 2009.,
 - Izvještaj o održavanju političkih konsultacija između Ministarstva vanjskih poslova BiH i Islamske Republike Irana u Teheranu, od 15. do 19. 11. 2008.,
 - Plan rada Koordinacionog tima za vođenje kampanje za nestalno članstvo BiH u Vijeću sigurnosti UN-a 2010.-2011.
14. Izvještaji o međunarodnim aktivnostima parlamentarnih delegacija PSBiH:
 - Zabilješka sa sastanka članova kolegija oba doma PSBiH sa gosp. Abdelom Hadijem Majalijem, predsjednikom Predstavničkog doma Hašemitske Kraljevine Jordan;
 - Izvještaj o posjeti Komisije za vanjske poslove PDPSBiH Odboru za vanjsku politiku Hrvatskog sabora, 1. i 2. 12. 2008.;
 - Izvještaj o službenoj posjeti članova Grupe prijateljstva PSBiH Republici Turskoj;
 - Izvještaj o aktivnostima delegacije PSBiH pri PS Centralnoevropske inicijative u 2008. godini;
15. Upoznavanje s Okvirnim planom međunarodnih aktivnosti PSBiH za 2009. godinu, s kriterijima o načinu njegovog provođenja;
16. Tekuća pitanja.

Predloženi dnevni red usvojen je jednoglasno.

1. Razmatranje Prijedloga zakona o dopuni Zakona o Javnom radiotelevizijskom sistemu BiH (druga komisijska faza), predlagač: Vijeće ministara BiH

Na početku je predsjedavajuća Komisije naglasila da se Prijedlog zakona razmatra u skladu s čl.104. i 105. Poslovnika, tj. radi dostavljanja Domu naroda izvještaja o Prijedlogu zakona. Dodala je da je Prijedlog zakona u parlamentarnu proceduru dostavilo Vijeće ministara BiH, 20.11.2008., uz traženje da se razmatra po osnovnom zakonodavnom postupku. Podsjetila je da je Komisija razmatrala Prijedlog zakona u prvom čitanju na 20. sjednici, održanoj 3.12.2008., i jednoglasno podržala principe predloženog zakona. Dom naroda usvojio je Prijedlog zakona u prvom čitanju na 24. sjednici, održanoj 29.1.2009. Predstavnički dom usvojio je Prijedlog zakona u drugom čitanju na 45. sjednici, održanoj 4.2.2009., s dva amandmana. Jedan amandman predložio je Sefer Halilović, a drugi amandman Komisija za saobraćaj i komunikacije Predstavničkog doma. Naglasila je da u Domu naroda u amandmanskoj fazi nije bilo uloženi amandmana na Prijedlog zakona.

Duška Majkić istakla je da će najvjerovatnije doći do usvajanja Prijedloga zakona u različitim tekstovima, te se osvrnula na drugi amandman usvojen u Predstavničkom domu u kojem je rečeno da je Vijeće ministara BiH dužno u budžetu institucija BiH osigurati sredstva u visini iznosa umanjene prihoda Javnog RTV sistema BiH do kojih će doći zbog oslobađanja plaćanja RTV takse vlasnika prijemnika kako je predviđeno Prijedlogom zakona i usvojenim amandmanima u Predstavničkom domu. Naglasila je da oni koji budu imenovani u komisiju za usaglašavanje teksta moraju voditi računa da ovaj amandman ne bude usvojen jer se, prema njenom mišljenju, radi o pitanjima iz oblasti socijalne politike a koja je u nadležnosti entiteta, te da zato ova oslobađanja ne treba prebacivati na državni budžet koji je ionako opterećen. Na kraju je predložila da Komisija podrži Prijedlog zakona u tekstu koji je preložilo Vijeće ministara BiH.

Zahida Hurtić-Strika, predstavnik Ministarstva prometa i komunikacija BiH, u svojoj diskusiji podsjetila je da je prijedlog za izradu ovog zakona potekao iz kabineta predsjedavajućeg Vijeća ministara BiH a na inicijativu Udruženja slijepih BiH. Dodala je da je Ministarstvo prometa i komunikacija BiH formiralo Radnu grupu u koju su, osim predstavnika nadležnih entitetskih ministarstava, i predstavnici sva tri javna emitera u BiH. Zaključak Radne grupe bio je da ne bi trebalo ići s predloženim izmjenama. Međutim, i pored takvog stava Radne grupe, Ministarstvo prometa i komunikacija BiH odlučilo je da se Prijedlog zakona ipak uputi u parlamentarnu proceduru.

Adem Ibrahimpašić naglasio je da on smatra da je svakako potrebno da se predvidi ko će i kako nadoknaditi sredstva koja će RTV izgubiti oslobađanjem slijepih i gluhih lica i da je zbog toga potrebno prihvatiti amandmane koje je već usvojio Predstavnički dom. Dodao je da se vjerovatno ne radi o velikim iznosima, ali da, bez obzira o kolikim sredstvima se radi, on smatra da se iz principijelnih razloga treba podržati takav pristup.

Rudo Vidović istakao je da podržava diskusiju Dušanke Majkić. Dodao je da bi se iz humanih razloga i mogao prihvatiti prvi amandman usvojen u Predstavničkom domu kojim se oslobađanje od plaćanja RTV takse proširuje i na gluha lica. Međutim, proširivanje oslobađanja te namirivanje tih oslobađanja iz budžeta moglo bi značajno opteretiti budžet institucija BiH. Zato je predložio da Komisija prihvati Prijedlog zakona u predloženom tekstu a da se do konačnog rješenja dođe kroz procedure usaglašavanja.

Slobodan Šaraba podsjetio je na svoje diskusije u prvoj komisijskoj fazi u kojima je istakao da do ovakvih situacija dolazi uvijek kada se zakonski prijedlog nađe u parlamentarnoj proceduri naprečac i bez adekvatne analize i pripreme. Dodao je da je očigledno da je potrebno da se oslobađanja prošire i na druge kategorije ali da će to onda izazvati značajne finansijske implikacije, odnosno intervencije iz budžeta. Stoga je predložio da se Prijedlog zakona uopće ne podrži nego da Vijeće ministara BiH prvo uradi kompletnu analizu o kategorijama i broju lica koja bi trebalo da budu oslobođena te o finansijskim efektima tih oslobađanja.

Nakonrasprave, Komisija za vanjsku i trgovinsku politiku, carine, saobraćaj i komunikacije Doma naroda Parlamentarne skupštine BiH je, sa četiri glasa „za“ i jednim glasom „protiv“, prihvatila Prijedlog zakona o dopuni Zakona o Javnom radiotelevizijskom sistemu BiH u predloženom tekstu, te predložila Domu naroda Parlamentarne skupštine BiH njegovo usvajanje.

2. Razmatranje Prijedloga zakona o dopuni Zakona o carinskoj tarifi BiH (prva komisijska faza), predlagač: Vijeće ministara BiH

Predsjedavajuća Komisije podsjetila je da se Prijedlog zakona razmatra u skladu s članom 98. Poslovnika, tj. radi dostavljanja Domu naroda mišljenja o principima predloženog zakona. Zatim je prisutne informirala da je Prijedlog zakona dostavilo Vijeće ministara BiH, 25.12.2008., sa zahtjevom da se razmatra po hitnom zakonodavnom postupku. Dom naroda razmatrao je zahtjev za hitni postupak na 24. sjednici, održanoj 29.1.2009., i odbio zahtjev da se Prijedlog zakona razmatra u hitnom postupku, te odlučio da se razmatra u skraćenom postupku. Dodala je da je Ustavnopravna komisija Doma naroda razmatrala Prijedlog zakona na 31. sjednici, održanoj 16.2.2009., i tom prilikom zaključila da postoji valjan ustavnopravni osnov za usvajanje navedenog zakona kao i usklađenost sa Ustavom BiH.

Zatim je predsjedavajuća podsjetila da je, shodno odredbama člana 98. stav (2), zatraženo i dobiveno mišljenje Direkcije za evropske integracije BiH u kojem je, između ostalog, konstatirano da je za Prijedlog zakona relevantna Uredba Komisije (EZ) br. 1214/2007, od 20.9.2007. Dalje je u mišljenju navedeno da je nakon provedene analize usklađenosti i upoređivanja Prijedloga zakona s navedenom uredbom zaključeno da su u Prijedlog zakona ugrađene odredbe Uredbe Komisije br. 1214/2007.

Predstavnički dom usvojio je Prijedlog zakona u prvom čitanju na 44. sjednici, 21.1.2009., a bit će razmatran u drugom čitanju na narednoj, 46. sjednici, 18.2.2009.

Šefika Tutundžić, šef Odsjeka za carinsku tarifu u Ministarstvu vanjske trgovine i ekonomskih odnosa BiH, dala je u ime predlagača uvodno obrazloženje Prijedloga zakona. Naglasila je da je osnovni razlog za donošenje zakona potreba da se domaćim proizvođačima šećera osiguraju približno isti uslovi privređivanja kao što imaju proizvođači u zemljama potpisnicama Sporazuma CEFTA i tako povećá korištenje instaliranih kapaciteta, zapošljavanje u BiH, konkurentnost domaćih proizvođača i smanji negativan trgovinski bilans Bosne i Hercegovine. Dodala je da je carinska stopa za ovaj repromaterijal (šećer za rafiniranje) 10% + 1%, znači 11%, dok se gotov šećer iz zemalja potpisnica Sporazuma CEFTA uvozi po stopi nula, odnosno bez plaćanja carine. Ako ne budu odobrene ove carinske kvote, proizvodnja šećera u BiH ne bi mogla biti rentabilna, odnosno konkurentna ni na domaćem ni na tržištu zemalja potpisnica Sporazuma CEFTA.

Adem Ibrahimpašić istakao je da smatra da sve proizvođače u Bosni i Hercegovini treba podržati i da ih treba osloboditi državnih nameta gdje je god to moguće da bi bili konkurentniji. U konkretnom slučaju radi se o sirovini za proizvodnju šećera iz šećerne trske koja se najvjerojatnije proizvodi u Brazilu. Šećer proizveden iz trske jeftiniji je od šećera proizvedenog iz šećerne repe. Istina, pojedine evropske zemlje proizvode i šećer iz repe kako bi se smanjila ovisnost od proizvođača šećerne trske. Na kraju je dodao da smatra da treba podržati Prijedlog zakona, pogotovo kada se već Uprava za indirektno oporezivanje BiH smilovala da da svoju saglasnost na ovaj zakonski prijedlog.

Dušanka Majkić podsjetila je da se u Domu naroda vodila žučna rasprava prilikom odlučivanja o proceduri, odnosno zahtjevu predlagača za hitni postupak. Podsjetila je da je zahtjev za hitni postupak odbijen, a da praktično nije bilo amandmana ni u Predstavničkom domu, te da smatra da se samo nepotrebno gubi vrijeme s obzirom da je Upravni odbor Uprave za indirektno oporezivanje BiH dao svoju saglasnost na ovaj prijedlog zakona i da bi donošenjem ovog zakona bila pružena značajna pomoć domaćoj proizvodnji te omogućeno smanjivanje vanjskotrgovinskog deficita.

Nakon rasprave, Komisija za vanjsku i trgovinsku politiku, carine, saobraćaj i komunikacije Doma naroda Parlamentarne skupštine BiH jednoglasno je podržala principe Prijedloga zakona o dopuni Zakona o carinskoj tarifi BiH.

- 3. Davanje saglasnosti za ratifikaciju Sporazuma između Bosne i Hercegovine i Švicarske o olakšicama prilikom izdavanja viza**
- 4. Davanje saglasnosti za ratifikaciju Sporazuma između Bosne i Hercegovine i Švicarske o readmisiji lica koja borave bez dozvole**
- 5. Davanje saglasnosti za ratifikaciju Sporazuma o zaštiti tajnih podataka između Vlade Slovačke Republike i Vijeća ministara BiH**
- 6. Davanje saglasnosti za ratifikaciju Sporazuma između Vijeća ministara BiH i Vlade Republike Crne Gore o vraćanju i prihvatanju lica čiji je ulazak ili boravak nezakonit i Protokola između Ministarstva sigurnosti BiH i Ministarstva unutrašnjih poslova i Javne uprave Republike Crne Gore o provođenju Sporazuma između Vijeća ministara BiH i Vlade Republike Crne Gore o vraćanju i prihvaćanju lica čiji je ulazak ili boravak nezakonit.**

Predsjedavajuća Komisije predložila je da se ova četiri međunarodna sporazuma razmatraju zajedno s obzirom da su svi u nadležnosti Ministarstva sigurnosti BiH, te da se odnose na srodna pitanja. Ovaj prijedlog jednoglasno je prihvaćen.

Obrazloženje je u ime nadležnog ministarstva dao Ljubomir Kuravica, šef odsjeka u Ministarstvu sigurnosti BiH. Prvo je napomenuo da su u nadležnosti njegovog odsjeka tri sporazuma i da je on učestvovao kao član delegacije u pregovorima dok je Sporazum o zaštiti tajnih podataka sa Slovačkom Republikom u nadležnosti drugog odsjeka čiji je predstavnik (Mate Miletić) spriječen da prisustvuje današnjoj sjednici jer je obavezan da bude na sjednici Predstavničkog doma koja se održava u isto vrijeme. U vezi sa Sporazumom o viznim olakšicama sa Švicarskom, istakao je da se radi o tipskom sporazumu koji je veoma sličan sa sporazumom koji je BiH potpisala sa EU, s tim što je Švicarska dala i dodatne povlastice u smislu oslobađanja od viza nosioce i službenih pasoša, dok je Evropska unija prihvatila oslobađanja samo za nosioce diplomatskih pasoša. Osim toga, Sporazumom je predviđeno da će Švicarska od ulaska u šengenski sistem, a to se već desilo 1. 1.2009., pridržavati svih obaveza koje proizilaze iz „Šengena“ kao i sve druge zemlje članice EU.

Sporazum između Bosne i Hercegovine i Švicarske o readmisiji lica koja borave bez dozvole također je tipski dokument i veoma sličan sporazumu koji je BiH potpisala sa EU. Jedna značajna razlika je što je, umjesto 10 kalendarskih dana u slučaju EU, Švicarska prihvatila 20 kalendarskih dana za odgovor na zahtjev za readmisiju.

U obrazloženju Sporazuma o readmisiji lica sa Crnom Gorom, istakao je da je to za BiH značajan međunarodni sporazum. Crna Gora nije htjela prihvatiti po osnovu sukcesije važenje prethodnog sporazuma sa Srbijom i Crnom Gorom. BiH ima ozbiljnih problema sa licima s Kosova i iz Albanije koja ilegalno preko Crne Gore ulaze u BiH. Ovim sporazumom značajno će biti olakšan proces vraćanja lica koja nezakonito dođu u BiH preko teritorije Crne Gore. Dodao je da je uz Sporazum potpisan i Protokol kojim se bliže definiraju pitanja značajna za provođenje Sporazuma, kao što su: kontaktne tačke, dokumenti koji će biti predmet dokazivanja i način vraćanja i prihvatanja.

Nakon izlaganja predstavnika nadležnog ministarstva, članovi Komisije jednoglasno su odlučili predložiti Domu naroda davanje saglasnosti za ratifikaciju:

- *Sporazuma između Bosne i Hercegovine i Švicarske o olakšicama prilikom izdavanja viza,*
- *Sporazuma između Bosne i Hercegovine i Švicarske o readmisiji lica koja borave bez dozvole,*
- *Sporazuma o zaštiti tajnih podataka između Vlade Slovačke Republike i Vijeća ministara BiH, i*
- *Sporazuma između Vijeća ministara BiH i Vlade Republike Crne Gore o vraćanju i prihvatanju lica čiji je ulazak ili boravak nezakonit i Protokola između Ministarstva sigurnosti BiH i Ministarstva unutrašnjih poslova i Javne uprave Republike Crne Gore o provođenju Sporazuma između Vijeća ministara BiH i Vlade Republike Crne Gore o vraćanju i prihvaćanju lica čiji je ulazak ili boravak nezakonit.*

7. Davanje saglasnosti za ratifikaciju Okvirne konvencije Svjetske zdravstvene organizacije o kontroli duhana

Uvodno obrazloženje dao je Adnan Husić, stručni saradnik u Sektoru za zdravstvo Ministarstva civilnih poslova BiH. Naglasio je da se ovom konvencijom reafirmiraju prava svih ljudi na najviše zdravstvene standarde, te da predstavlja prvi međunarodni dokument o kontroli duhana dogovoren pod pokroviteljstvom Svjetske zdravstvene organizacije u čijoj izradi su učestvovala 192 zemlje među kojima i Bosna i Hercegovina. Dodao je da je Konvenciju do sada potpisalo 168 zemalja. Vijeće ministara BiH je, na 54. sjednici, odlučilo da se pokrene postupak za pristupanje Bosne i Hercegovine Okvirnoj konvenciji Svjetske zdravstvene organizacije o kontroli duhana i zaduženo je Ministarstvo civilnih poslova BiH da provede proceduru. Predsjedništvo BiH je na 64. sjednici, održanoj 19.8.2008., donijelo odluku o pristupanju BiH ovoj konvenciji.

Nakon izlaganja predstavnika nadležnog ministarstva, članovi Komisije jednoglasno su odlučili predložiti Domu naroda davanje saglasnosti za ratifikaciju Okvirne konvencije Svjetske zdravstvene organizacije o kontroli duhana.

- 8. Davanje saglasnosti za ratifikaciju Memoranduma o razumijevanju između Bosne i Hercegovine i Evropske zajednice o pridruživanju Bosne i Hercegovine Sedmom okvirnom programu Evropske zajednice za istraživanje, tehnološki razvoj i ogledne aktivnosti**
- 9. Davanje saglasnosti za ratifikaciju Sporazuma između Vijeća ministara BiH i Vlade Republike Crne Gore o saradnji u oblasti kulture**

Predsjedavajuća Komisije predložila je da se ova dva međunarodna sporazuma razmatraju zajedno s obzirom da su oba u nadležnosti Ministarstva civilnih poslova BiH. Prijedlog je jednoglasno prihvaćen.

Uvodno obrazloženje o oba sporazuma podnijela je Biljana Čamur, pomoćnica ministra civilnih poslova BiH. Naglasila je da se potpisivanjem Memoranduma o razumijevanju između Bosne i Hercegovine i Evropske zajednice o pridruživanju Bosne i Hercegovine Sedmom okvirnom programu Evropske zajednice za istraživanje, tehnološki razvoj i ogledne aktivnosti omogućava istraživačima iz Bosne i Hercegovine da kao i istraživači iz Evropske unije apliciraju za naučnoistraživačke projekte koji se finansiraju iz sredstava EU. To je značajna promjena u odnosu na dosadašnju situaciju kada se naši istraživači nisu mogli direktno pojaviti s projektima nego su morali ići preko posrednika iz zemalja Evropske unije. U vezi sa Sporazumom između Vijeća ministara BiH i Vlade Republike Crne Gore o saradnji u oblasti kulture, istakla je da će se ovim sporazumom podsticati i podržavati razmjena i saradnja institucija obje zemlje u oblasti kulture.

Nakon izlaganja predstavnice nadležnog ministarstva, članovi Komisije jednoglasno su odlučili predložiti Domu naroda davanje saglasnosti za ratifikaciju:

- *Memoranduma o razumijevanju između Bosne i Hercegovine i Evropske zajednice o pridruživanju Bosne i Hercegovine Sedmom okvirnom programu Evropske zajednice za istraživanje, tehnološki razvoj i ogledne aktivnosti, i*
- *Sporazuma između Vijeća ministara BiH i Vlade Republike Crne Gore o saradnji u oblasti kulture.*

- 10. Davanje saglasnosti za ratifikaciju Sporazuma o zajmu između Bosne i Hercegovine i Evropske banke za obnovu i razvoj – Projekat Koridor Vc**
- 11. Davanje saglasnosti za ratifikaciju Izmjene sporazuma između Vijeća ministara BiH, koje predstavlja Ministarstvo finansija i trezora BiH, i Vlade Republike Austrije, koju predstavlja savezni ministar finansija o finansijskoj saradnji**

Predsjedavajuća Komisije predložila je da se ova dva međunarodna sporazuma razmatraju zajedno s obzirom da su oba u nadležnosti Ministarstva finansija i trezora BiH te da se odnose na srodnu problematiku. Prijedlog je jednoglasno prihvaćen.

Uvodno obrazloženje za oba sporazuma dao je Miroljub Krunić, pomoćnik ministra finansija i trezora BiH. Naglasio je da je Sporazum s Evropskom bankom nastao iz potrebe za finansiranjem Koridora Vc na dijelu koji prolazi kroz Federaciju BiH. Sporazum je zaključen pod standardnim uslovima EBRD-a. Ukupna vrijednost je 180 miliona eura, a rok otplate je 15 i po godina. Zajam je namijenjen za finansiranje 66 km autoputa. Drugi sporazum odnosi se na izmjene postojećeg sporazuma između BiH i Austrije. Do potrebe za izmjenom došlo je zbog iscrpljivanja izvora finansiranja po prvobitnom sporazumu u iznosu od 25 miliona eura. Izmjenom se odobrava novi iznos od 50 miliona eura uz blage izmjene uslova finansiranja ali uz zadržavanje postojećeg nivoa koncesionalnosti od 35%. Pored toga, ovom izmjenom povećava se zastupljenost domaćih roba i usluga sa 30 na 40%. Nakon ove izmjene bit će moguće finansiranje projekata koji su već ranije dogovoreni ali za koje nije bilo dovoljno sredstava za finansiranje (finansiranje infrastrukture u opštinama Srbac, Laktaši, Zenica, Kiseljak).

Nakon izlaganja predstavnika nadležnog ministarstva, članovi Komisije jednoglasno su odlučili predložiti Domu naroda davanje saglasnosti za ratifikaciju:

- *Sporazuma o zajmu između Bosne i Hercegovine i Evropske banke za obnovu i razvoj – Projekat Koridor Vc, i*
- *Izmjene sporazuma između Vijeća ministara BiH, koje predstavlja Ministarstvo finansija i trezora BiH, i Vlade Republike Austrije, koju predstavlja savezni ministar finansija o finansijskoj saradnji;*

12. Razmatranje Izvještaja Ministarstva vanjske trgovine i ekonomskih odnosa BiH o realizaciji Akcionog plana za provođenje programa mjera u okviru CEFTA sporazuma s Analizom vanjskotrgovinske razmjene BiH za 2008.;

Uvodno obrazloženje dao je Sabrija Šerifović, pomoćnik ministra vanjske trgovine i ekonomskih odnosa BiH. Podsjetio je da je Izvještaj o realizaciji Akcionog plana za provođenje Programa mjera u okviru Sporazuma CEFTA, zajedno s Informacijom o robnoj razmjeni BiH za prvih devet mjeseci 2008., Ministarstvo vanjske trgovine i ekonomskih odnosa BiH dostavilo Parlamentarnoj skupštini BiH 10.12.2008. Dodao je da je Izvještaj o realizaciji Akcionog plana za provođenje Programa mjera u okviru Sporazuma CEFTA Vijeće ministara BiH razmotrilo na 67. sjednici, održanoj 26.11.2008., i da je na toj sjednici zaduženo Ministarstvo vanjske trgovine i ekonomskih odnosa BiH da taj izvještaj, zajedno s Informacijom o robnoj razmjeni BiH, dostavi Parlamentarnoj skupštini BiH. Također je podsjetio članove Komisije da se Izvještaj o realizaciji Akcionog plana za provođenje Programa mjera u okviru Sporazuma CEFTA i Analiza vanjskotrgovinske razmjene BiH za 2008. godinu dostavljaju shodno zaključcima oba doma Parlamentarne skupštine BiH koji su usvojeni prilikom usvajanja Programa mjera za provođenje Sporazuma CEFTA.

U nastavku izlaganja osvrnuo se na pojedine elemente iz Izvještaja te posebno na neke ključne pokazatelje iz Analize vanjskotrgovinske razmjene BiH u 2008. godini. Posebno je istakao da, uprkos najavama, nije došlo do značajnije promjene u razmjeni BiH sa zemljama potpisnicama Sporazuma CEFTA. Učešće izvoza i uvoza ostalo je na približno istom nivou dok je zabilježen pad stope rasta i uvoza i izvoza.

Adem Ibrahimpašić istakao je da niko u BiH ne štiti Sporazum CEFTA. Naveo je primjer vode za koju je u slučaju izvoza u Republiku Hrvatsku potrebno imati certifikat izdat od odgovarajuće kontrolne kuće iz Evropske unije dok je za uvoz vode iz Republike Hrvatske u Bosnu i Hercegovinu dovoljno da je prati certifikat izdat u Hrvatskoj. Istakao je da je situacija slična i za skoro sve druge proizvode, te u tom smislu ukazao da je potrebno uvesti reciprocitet.

Dušanka Majkić pitala je predstavnika Ministarstva vanjske trgovine i ekonomskih odnosa BiH da li je Ministarstvo kadrovski adekvatno popunjeno da bi se realizirale sve navedene mjere iz Programa mjera kao i svi drugi zadaci koji stoje pred ovim ministarstvom. Posebno je ukazala na budžetska ograničenja, donosno ograničenja u pogledu novog zapošljavanja.

Sabrija Šerifović potvrdio je da je to zaista ozbiljan problem za Ministarstvo te da je sada popunjenost oko 60%. Relativno niske plaće u prethodnom periodu prije donošenja Zakona o plaćama nisu bile dovoljno primamljive da bi se zaposlili kvalitetni kadrovi. Sada su novim zakonom plaće povećane, međutim restriktivan budžet ne dozvoljava prijem novih službenika.

Nakon rasprave, Komisija za vanjsku i trgovinsku politiku, carine, saobraćaj i komunikacije Doma naroda Parlamentarne skupštine BiH je, većinom glasova (četiri glasa "za" i jedan glas "protiv"), usvojila Izvještaj o realizaciji Akcionog plana za provođenje Programa mjera u okviru CEFTA sporazuma, te predlaže Domu naroda Parlamentarne skupštine BiH njegovo usvajanje.

Komisija za vanjsku i trgovinsku politiku, carine, saobraćaj i komunikacije Doma naroda Parlamentarne skupštine BiH primila je k znanju Analizu vanjskotrgovinske razmjene Bosne i Hercegovine za 2008.godinu i predlaže Domu naroda Parlamentarne skupštine BiH da učini isto.

13. Razmatranje izvještaja i informacija Ministarstva vanjskih poslova BiH:

- **Rezolucija o Srebrenici, sjednica Evropskog parlamenta, Strazbur, 14. i 15. januar 2009.,**
- **Izvještaj o 11. interparlamentarnom sastanku delegacije Parlamentarne skupštine BiH i Evropskog parlamenta, Brisel, 21. i 22. 1. 2009.,**
- **Izvještaj o održavanju političkih konsultacija između Ministarstva vanjskih poslova BiH i Islamske Republike Irana u Teheranu, od 15. do 19.11. 2008.**

Članovi Komisije za vanjsku i trgovinsku politiku, carine, saobraćaj i komunikacije Doma naroda Parlamentarne skupštine BiH primali su k znanju sva tri prethodna izvještaja Ministarstva vanjskih poslova BiH.

- **Plan rada Koordinacionog tima za vođenje kampanje za nestalno članstvo BiH u Vijeću sigurnosti UN-a 2010.-2011.**

Dodatne informacije o Planu rada Koordinacionog tima za vođenje kampanje za nestalno članstvo Bosne i Hercegovine u Vijeću sigurnosti Ujedinjenih naroda za period 2010. – 2011. dao je Miloš Prica, ambasador u Ministarstvu vanjskih poslova BiH. U svom izlaganju je posebno naglasio da su šanse koje BiH ima da postane nestalna članica Vijeća sigurnosti UN-a izuzetno velike, pogotovo nakon što je u septembru prošle godine Poljska povukla svoju kandidaturu tako da je Bosna i Hercegovina ostala sada jedini kandidat za mjesto nestalne članice ispred istočnoevropske grupe zemalja. Dalje je dodao da bi BiH i bila izabrana potrebno je da za nju glasaju dvije trećine prisutnih, što u slučaju da su glasanju prisutne sve članice UN-a znači 128 zemalja. Do sada je 57 zemalja članica Ujedinjenih naroda dalo svoju pismenu podršku izboru Bosne i Hercegovine, a jedan značajan broj zemalja obećao je da će tu podršku dati u narednom periodu. Dalje je naglasio da je veoma važno da se BiH već sada počne pripremati za buduće članstvo u Vijeću sigurnosti te posebno treba ojačati Misiju BiH pri UN-u u Njujorku, te također kadrovski ojačati odsjeke u Ministarstva vanjskih poslova BiH koji su značajni za efikasan rad BiH u Vijeću sigurnosti, kao što su Odsjek za Aziju i Afriku, Odsjek za susjedne zemlje (zbog pitanja Kosova), Odsjek za međunarodnopravne poslove (zbog saradnje s Tribunalom u Hagu).

U nastavku se osvrnuo na formiranje i dosadašnji rad Koordinacionog tima. Koordinacioni tim formiran je 29.12.2009. i do sada je održao dvije zvanične sjednice. Predviđeno je da članovi tima, osim predstavnika Ministarstva vanjskih poslova BiH, budu još predstavnici iz kabineta članova Predsjedništva BiH, iz Kabineta predsjedavajućeg Vijeća ministara BiH, predstavnik Parlamentarne skupštine BiH. Posebno je istakao da lobiranje za članstvo nije samo projekat Ministarstva vanjskih poslova BiH nego projekat Bosne i Hercegovine. Predstavnik Parlamentarne skupštine BiH ne mora nužno biti njen član, odnosno poslanik ili delegat. Bitno je da se zna koje je to lice i da bude u funkciji pravovremenog prenošenja informacija od Parlamentarne skupštine BiH ka Koordinacionom timu i obrnuto.

Predsjedavajuća Komisije podsjetila je da je o ovoj temi bilo razgovora na prethodnoj sjednici, na kojoj su članovi Komisije upoznati o tome da je Kolegij Predstavničkog doma zadužio Komisiju za vanjske poslove Predstavničkog doma da incira konsultacije s ovom Komisijom u vezi s imenovanjem predstavnika Parlamentarne skupštine BiH u Koordinacionom timu. Na kraju je konstatirala da su *članovi Komisije za vanjsku i trgovinsku politiku, carine, saobraćaj i komunikacije Doma naroda Parlamentarne skupštine BiH primili k znanju Plan rada Koordinacionog tima za vođenje kampanje za nestalno članstvo BiH u Vijeću sigurnosti UN-a 2010.-2011.*

14. Izvještaji o međunarodnim aktivnostima delegacija PSBiH:

- **Zabilješka sa sastanka članova kolegija oba doma PSBiH s gosp. Abdelom Hadijem Majalijem, predsjednikom Predstavničkog doma Hašemitske Kraljevine Jordan;**
- **Izvještaj o posjeti Komisije za vanjske poslove PDPSBiH Odboru za vanjsku politiku Hrvatskog sabora, 1. i 2. 12. 2008.;**
- **Izvještaj o službenoj posjeti članova Grupe prijateljstva PSBiH Republici Turskoj;**
- **Izvještaj o aktivnostima delegacije PSBiH pri PS Centralnoevropske inicijative u 2008. godini.**

Članovi Komisije za vanjsku i trgovinsku politiku, carine, saobraćaj i komunikacije Doma naroda Parlamentarne skupštine BiH primili su k znanju sve gornje izvještaje o međunarodnim aktivnostima delegacija Parlamentarne skupštine BiH.

15. Upoznavanje s Okvirnim planom međunarodnih aktivnosti PSBiH za 2009. godinu, s kriterijima o načinu njegovog provođenja

Članovi Komisije za vanjsku i trgovinsku politiku, carine, saobraćaj i komunikacije Doma naroda Parlamentarne skupštine BiH primili su k znanju Okvirni plan međunarodnih aktivnosti PSBiH za 2009. godinu, s kriterijima o načinu njegovog provođenja.

16. Tekuća pitanja.

Nije bilo rasprave o ovoj tački dnevnog reda.

Sjednica Komisije završena je u 13,30 sati.

Sekretar Komisije
za vanjsku i trgovinsku politiku,
carine, saobraćaj i komunikacije
Nenad Pandurević

Predsjedavajuća Komisije
za vanjsku i trgovinsku politiku,
carine, saobraćaj i komunikacije
Alma Čolo